

四庫全書

史部

欽定四庫全書

史部

續資治通鑑長編卷二百八十七

詳校官檢討

臣

劉錫五

刑部郎中

臣

許兆椿履勘

纂修官修撰

臣

黃軒

謄錄監生

臣

黃琮

欽定四庫全書

續資治通鑑長編卷二百八十七

宋 李燾 撰

神宗

元豐元年春正月庚戌詔河北轉運司令所在長吏躬
禱名山靈祠旱故也

壬子命輔臣祈雨 魏國安仁保佑夫人張氏乞依赦

封二代從之 神宗乳母熙寧八年二月自崇國改封魏國

甲寅右諫議大夫提舉崇禧觀沈立卒

乙卯集禧觀使鎮南節度使同平章事王安石為右僕射觀文殿大學士集禧觀使放朝謝安石辭使相乞以本官領宮觀屢詔不允而安石辭不已故有是命交趾郡王李乾德上表言伏蒙賜詔從臣所請自今復脩職貢已令安撫司各差人畫定疆界毋得輒侵犯臣已奉詔遣人送方物乞賜還廣源机榔等州縣詔候進奉人到闕別降疆事處分又詔河北路轉運司檢放水

災民戶秋稅欠負展限輸納 又詔京西淮南路轉運

司訪名山靈祠委長吏禱雨雪 權御史中丞鄧潤甫

言知虢州鄧綰近復龍圖閣待制中外之論皆謂綰在

言路肆為邪慝陰連公府掾屬數為大臣祈懇乞除大

臣之子館職傳笑四方傷辱國體近世處言職者未嘗

有也陛下以綰操心頗僻賦性姦回論事薦人不循分

守故斥逐之今綰去位未幾亟還近職搢紳藉藉莫知

所謂蓋蘇頌奪職八年而後復諫議大夫曾布五年而

後得待制綰何人獨此超越乞追寢成命以厭公論詔
綰罷龍圖閣待制以本官充集賢院學士知河陽

丁巳詔國子監丞主簿省一員

戊午判太常寺樞密直學士陳襄崇政殿說書同修起
居注太子中允集賢校理黃履太常博士集賢校理李
清臣秘書丞集賢校理王存詳定郊廟奉祀禮文太常
寺主簿秘書丞楊完御史臺主簿著作佐郎何洵直國
子監直講密縣令孫諤充檢討官先是手詔講求郊廟

奉祀禮文訛舛宜令太常寺置局仍差定禮官數員及

許辟除官屬討論歷代沿革以考得失故命襄等

五年四月

十一日成書熙寧十年十二月甲午黃
復云云舊紀書命官詳定郊廟祝文

皇城使達州

刺史入內副都知蘓利涉為海州團練使時利涉校年

止當遷官而詔以利涉逮事先朝藩邸故特有是命

減併陳留捧日天武第七軍第一武騎帶甲剩員亳州

第一龍衛帶甲剩員陳留第一亳州第二尉氏驍猛第

二南京雄威第八咸平雄勇第二第三鄆州第五許州

第六管城第七白馬第八總十三指揮每軍止各置一指
指揮並以五百人為額餘數聽額外收管 經制熙河
路邊防財用乞封椿息錢以備朝廷移用如鑄錢鹽井
之類與轉運司錢本相干者並以熙寧九年為額本司
認數撥還從之

己未荆湖南路安撫使謝景溫言奉詔相度轉運司乞
補徽誠州溪峒蠻職名俸給事臣詳朱初平招撫楊光
偕等各與官職請受其歸明地依舊住坐緣楊族諸蠻

顧懋巢穴本亦不敢輕犯邊境昨既得官資請受安土
樂業悉如故時所以近上首領爭出聽命比至初平等
不帶兵甲親入招安遂生驚疑已恐朝廷經畫其地故
楊昌普等遮擁道路殺害使臣幾成邊患今若修建城
寨留戍官兵必以為朝廷利其土田增置州縣人懷遷
徙之憂勢疑事迫必合而為姦今近上首領既已受命
利於俸給其餘族類自不敢動又已有關峽武陽兩寨
控扼更不須別作防守若二三年間愚信浹洽使其向

化之人轉相勸諭然後經制城寨亦未為晚所欲補楊
晟堅巡防名目緣晟堅號為桀黠蠻人畏服今忠順之
誠尚未可保而遽補之職名萬一假朝廷之勢役屬諸
蠻黨類附從非我之利謂當如舊為使其朱初平招納
之時所差使勾當人楊晟勝等或先率衆通道或招同
類來歸委有勤効未嘗推恩及熙寧五年先歸明見為
衙職者總五十人並乞依轉運司所奏等第推恩三州
一鎮自未歸明以前每歲進奉總請券二千四百餘緡

昨補逐人官職料錢衣絹歲計三千七百餘緡以進奉
券錢折除外歲不過給七百九十餘緡若依轉運司所
乞續補楊晟勝等名目須給請受緣逐人所給止是一
卒之費終其一身以歲月較之不過十餘年盡矣詔如
景溫所奏令轉運司具合與楊晟勝名目請受以聞

賜廣濟河輦運司上供米十萬石付徐州淮陰軍出糶
以賑水灾饑民 三司言建州熙寧六年買茶三十二
萬九千餘觔有竊惡茶剝納錢三萬六千餘緡當於園

戶及干繫人名下理納雖淹歲月以致破產未必能償
乞計其直令復準茶入官以寬遠民監催追擾之弊從
之本志有此但改熙寧六年作今歲則誤也提點南郊事務向宗儒乞自
東墻門內布黃道至望燎位下禮院詳定闕報入式從
之

庚申詔權御史中丞鄧潤甫翰林學士許將與三司并
都理欠司同詳定該赦合放欠負以聞

辛酉詔川廣福建路官在任或替移未出本路身亡雖

已請接送雇人錢許差坐船一隻 又詔諸路州軍關
雨雪過多委提舉司月一申中書進呈令司農寺注籍
癸亥詔自今學官非公筵不得豫妓樂會從知永興軍
呂公孺請也 判司農寺熊本言近諸路皆言甲頭催
稅未便今相度欲令諸路依元定役法錢數雇募戶長
如未有人應募據稅戶多寡輪四等以上保丁催稅每
都保毋得過五人每人須催百戶以上量所催多少支
給雇錢共毋得過元雇戶長錢數依舊一稅一替願再

充者聽如有違犯並依舊條內甲頭減戶長一等詔送

司農寺相度以聞

置催稅甲頭在熙寧八年閏四月乙巳

詔經制熙河

路邊防財用司兼秦鳳路財用司御批改用字作利字

改用作利此據御集其後却並作用字不知何故當考熙寧十年十二月辛丑已詔經制司兼秦鳳此又重出

遣西京左藏庫副使元日宣兩浙路文思副使曹詔

江南東路點閱團結諸軍降前知真定府龍圖閣直

學士吏部侍郎致仕韓贄一官追其孫思純將作監主

簿告通判鄭淵簽書判官王欽臣各降一官判官許章

推官劉處厚各衝替司隸參軍劉舜理以下三人勒停
北寨主楊充德以下三人除名編管並不用赦降去官
坐牒易州捕盜誤以解子平為北界地啟其爭疆之隙
也

此事當考詳贄新舊傳俱不載
此贄知真定時乃治平二年

詔提舉成都府等

茶場司李稷相度置場買茶聽商人於熙河路入錢及
糧草定價給引指射請販利害以聞

甲子詔入內侍省闕官罷都知張茂則都大提舉修
閉澶州曹村決口命龍神衛四廂都指揮使榮州防禦

使燕達為提舉本所兵馬總管仍於北京差禁軍二十人隸總管司 詔權發遣夔州路轉運副使董鉞成資

日升一任留再任仍自今夔州路轉運使副判官提點刑獄如令再任者並取裁與升任或減磨勘年 審官

東院言廣南兩路員闕願就之人少欲乞水土惡弱處為一等繁難處為一等其餘並為一等令轉運司保明申奏從之 司農寺言諸路命官使臣因軍期亡歿其子孫不該廕免者本戶役錢減放五年從之 詔免京

東西路轉運司年紀封樁錢糧以本路言水災闕乏故也

乙丑遣官謝雨 詔自今樞密院諸房副承旨出職與主事請受為州鈐轄 權發遣三司使李承之言近年以來朝廷寬假資格稍高之人為其衰遲或不任事未欲遽令休退故置提舉管勾宮觀之職優與俸祿以示始終恩意之厚不立員數而臣僚趨聞貪祿冒昧無耻或精神未衰年齒方壯便私避事亦求此職條制既寬

初未釐革故今內外宮觀約百餘員無纖芥職事歲費廩食不下數萬緡臣竊惜之乞今後在京宮觀提舉提點管勾官共毋得過十五員諸路倍之如有除授令依例待闕所貴勤勞官守之人有以區別不虛費國用詔自今陳請宮觀等差遣人年六十以上聽差仍毋過兩次

宮觀限年及次數墨本在二月辛亥今從朱本移入此

詔以太皇太后聖體

久未康平其令開封府及諸路訪衆所見效口齒科給裝錢乘驛赴闕又詔經制熙河路邊防財用司根括

冒耕地為官莊限半年聽民自陳其方田更不施行舉
貸止支錢納日計市直許以糧折納收息二分願納錢
增一分

熙寧七年三月六日又元豐元年十二月十七日可考

司農寺請令諸

路依舊置牙司從之

丁卯詔提舉永興等路刑獄公事王孝先置獄涇州根
治摩丹當博事能自陳即免罪若告得實者與班行酬

獎

事具二年五月乙未

成都府等路茶場司言應賣茶官如非

其人許本司選擇於事簡處對移如闕正官即於得替

待闕官內差權或指名牒轉運司差從之 樞密院言

昨降濶閃弓樣令軍器監依樣打造今一千三百六十張已了九百三十張已了未樺一萬張未計料詔其已了并未樺兩色內共先次支二千張與提舉教習馬軍

所

元豐元年正月
二十一日手札

戊辰錄三班奉職劉通一子為三班借職通隨軍攻討山後生羌充中軍大部騎隊戰歿故也後父昌祚言通無子以其弟逸之子維為後詔授維官為通後 詔秦

鳳等路轉運副使同經制熙河路邊防財用太常博士
趙濟候經畫就緒與除館職 又詔司農寺應常平存
留一半錢穀糶糴數目每歲終類聚於次年春季點校
仍開具逐路以聞 賜度僧牒百付京東路轉運司撥
還徐州築城興置木岸等所借常平錢 前司門郎中
王伯瑜乞改京東河北四路產鹽場為市易鹽務官買
於竈戶以售商人詔都提舉市易司召伯瑜審議上韓
絳書論此執時在密州 蓋熙寧七八年事當考伯
瑜提舉河北京東鹽稅再任在熙寧五年十二月 詔

同提舉荆湖北路常平等事著作佐郎張琬衝替坐越

職言荆南張頴不當也

熙寧十年七月辛未頴自京南
帥移廣西漕元祐元年七月己

丑頴除戶侍蘓轍論奏張琬所劾事具注熙寧十年七
月辛未頴移荆南時張昇有子名琬不知卽是此人

否

己已著作佐郎權檢詳兵房文字范育復崇文院校書

詔河北路權停折納以經水災糧草貴也 刑部員

外郎知制誥熊本落知制誥為屯田員外郎分司西京

饒州居住大理寺丞權外都水監丞陳祐甫為潁州團

練推官權知都水監主簿司農寺主簿婺源縣丞史邈
追兩官與遠小處合入差遣權外都水監丞主客郎中
范子淵追一官差遣依舊並免勒停權河北東路轉運
副使金部員外陳知儉追一官衝替文彥博特放大名
府寇氏臨清清平縣干繫官吏并東流南岸都大司並
令提點刑獄司劾之其運河置牒令都水監再相度本
坐按視濬河不實緣疏濬有河退地二萬二千三百頃
而附會報不以實法非因公事不得赴州郡酒食而本

違法赴彥博會子淵所稱河退地雖實而以二年數誤
併為一年奏上祐甫邈知儉皆附會失實故有是命濬
川杞僅同兒戲子淵所稱固多妄然邈初勸本先行河
決利害乃見彥博而本言彥博三朝舊臣小利害安能
動搖又修私敬於彥博子淵具以告故上不直本也

朱史

削去濬川杞同兒戲及上不直本等語專以元斷案修
定新本已復存之元斷案固不可隱落而墨史所書乃
實事也九年十二月癸未始命本相視舊紀書熊本按
視濬河附下失實落知制誥分公司西京新紀不書鄧
潤甫作熊本神道碑云會中貴人程昉欲於衛州西南
鑿隄引河通江淮都水丞范子淵建疏濬司以鐵龍爪

疏黃河謂可回奪河勢欲附會退灘地為疏濬功事下
河北安撫司帥臣文潞公言小臣興功罔利皆非實詔
公覆視公還奏昉云六隄引河非是疏濬計功皆妄願
先罷提舉司已而諫官論公嘗以議事會食大名府非
法坐降屯田員外郎分司西京然亦廢漕河罷疏濬司
碑蔡卞書彭汝礪作本墓銘云會中責程昉欲作運
河通江淮都水丞范子淵以鐵龍爪疏河謂可回大河
之勢而附會退灘地為疏濬功文潞公判大名府言小
臣興功罔利欺上皆非實公被命覆視將行執政以利
害陷公公哂之既至具得欺罔狀還奏乞先罷都大提
舉司寢與時齟齬公論之益急言者遂斥公嘗以議事
會食大名非法坐降屯田員外郎分司西京未幾運河
塞疏濬
司亦罷

庚午詔屯田郎中前知洺州萬贖除落差替令河北西

路提點刑獄韓宗道具析體量贖違慢詔條不實因依以聞初宗道奏贖奉行條法有違而贖自列辨正朝廷知其無罪也其後宗道以體量不當罰銅十觔

十年三月二十

一日河北憲司言贖不堪治治却不載差替指揮

辛未命度支員外郎秘閣校理同修起居注檢正中書戶房公事安燾假左諫議大夫史館修撰為高麗國信使著作佐郎集賢校理同知太常禮院林希假右正言直昭文館副之先是權知高麗國王王徽比年遣使朝

貢上嘉其勤誠待遇良厚故遣燾等使其國

九月二十一日回至

明州舊紀但書遣官新紀乃出安燾姓名

詔河北東路緣邊軍留糧三年

餘州軍留二年支遣外其餘聽依市直量減價糶毋損

元價其錢封樁候歲豐糶入元數 詔成都府路轉運

司劾成都府官司越職受理茶場司事者茶園戶等如

有罪亦劾之已決者具析以聞以李穰言知成都府劉

庠受名山知縣楊少逸越訴事不可提舉茶場司故也

初少逸因民訟以狀白庠願聞於朝督茶吏路玠監傳

郵而藏之庠具奏其事且言榷茶害遠方請重黠玠而

稷方主玠論庠越職故有是詔

此據呂陶誌庠墓

三司乞量

增在京酒行麴錢於年額減麴三十萬觔遇閏年增造

萬觔均給從之

熙河路經畧司張詵乞下監司收捕

遊邊人傳押歸本貫詔經畧司發遣許人告賞錢百十

犯者不用蔭官員具案聞奏

壬申光祿卿知潞州史炤再任炤考課為河東第一故

也詔樞密副都承旨張誠一與高麗國信使副同詳

定一行儀物 上批故贈康王宗樸先帝近親其子仲容仲壬候服闋各遷一官女二人與縣主後母得援以為例

癸酉司農寺言淮南東路提舉司乞本路縣並用鄉村民戶物產實直錢數敷出役錢從之 復桂州修仁鎮

為縣

閏正月丙子朔權發遣戶部副使兵部郎中陳安石為集賢殿修撰河東都轉運使尋詔河東路十三州歲給

和糴錢八萬餘緡自今罷之以其錢付轉運司市糴糧
草先是安石乘驛與知太原府韓絳同轉運司講求邊
儲利害絳乞改和糴之法減放原數三分罷官支錢布
但寬其支移之苦則實惠已及於民遇災傷十七則又
除之而安石言十三州二稅以石計之凡三十九萬二
千有餘而和糴之數凡八十二萬四千有餘所以災傷
舊不除免益十三州稅輕又本地恃為邊儲理不可闕
故也其和糴舊支錢布相半數既畸零民病入州縣之

費以鈔買錢於市人畧不收半公家文費實錢而百姓
乃得虛名欲自今罷文糴錢歲以其錢文與緣邊州郡
市糧草封樁遇災傷據民不能輸數補填如無災傷三
年一免輸以封樁糧草充數即不須如韓絳減數三分
及災傷除十七朝廷以為然乃命安石為河東都轉運
使悉推行之又降是詔詔乃初十日事今并書之熙寧九年十一月十四日韓絳云云
十年九月十八日絳又云云食貨志第五卷熙寧九年
十二月知太原府韓絳云云元豐元年閏正月詔遣三
司戶部副使陳安石詣太原府與絳及本路轉運司共
議其事安石言永利東西監鹽請如慶厯前商人輸錢

於麟府豐代嵐憲忻奇嵐寧化保德火山等州軍本州
軍乃給券於東西監請鹽以除加饒折糴之弊仍令商
人自占所賣地即鹽已運至場務者商人買之加運費
如是則官鹽平商販通於事簡便朝廷行其說即除安
石為河東都轉運使安石請犯西北青白鹽者以皇祐
杖論罪首從皆編配又青白鹽入河東犯人罪至流所
歷官不察者罪之四年七月安石自言元豐元年奉詔
治鹽事歲有羨餘及增收忻州鹹城鐺戶馬城池鹽課
詔安石還官賞其屬五年四月詔安石前後奏請和糴
鹽磬坑治之類施行已就緒召為戶部侍郎其職事委
莊公岳蔡煜奉行之三年
閏九月十一日議鹽賞

河東轉運副使國子博士

趙子幾提點三司帳司勾院磨勘司仍自今依三司判

官法差人 提舉修閑澶州曹村決口所兵馬總管燕

達言所總士卒甚衆如有犯無禮及呼萬歲者即於豁口處斬若有扇搖軍人畧奪財物及叫呼動衆為首情重者亦乞斬訖以聞為從者減等配千里外牢城從之仍詔差雲騎第六一指揮為達牙隊 中書言在京舉

差選人處欲並令舉京朝官或使臣見任選人聽滿任惟市易上界監官檢估官雖進納選人聽差從之仍候見任人滿日施行 提舉修閉曹村決口所言以今月丙戌築簽隄開脫水河遣權判太常寺李清臣乘驛祭

告就差走馬承受韓永式齋香建道場三晝夜仍令候
河水稍渾閉口即毋得沙損京東一帶民田

丁丑詔自今大禮聽起居郎起居舍人奏薦親族至六

年復罷

中書時政記云熙寧十年十一月南郊奏薦
恩澤共四百餘員因有詔添入兩史官奏薦

河東經畧使韓絳言麟州靜羌寨星最朗木瓜舖地委
係省田即非兩不耕地管勾軍馬邢佐臣偏見遂非遷
延不決中書進呈詔劾佐臣罪既而上批早來取勘邢
佐臣不處畫地界事恐自有理可且令分析以聞後佐

臣言既為經司體量豈有不實乞移河北一任遂移恩
州鈐轄

戊寅三司請應在官司支係省錢物及拋降計置出納
移用並關申三司相度指揮從之 荆湖北路提點刑
獄司乞辰州會溪城黔安寨依沅州城寨例置牢屋區
斷公事從之 前知曹州劉攽言伏見知濟陰縣羅適
開導古滉河決洩積水有功適議以為若明年春許差
人夫及聽民願併力施功則爾後水害可使永除乞下

本州速與應副上批可記適名姓俟府界劇縣有關與
差以考其治能之實於是以適知陳留縣仍詔適留舊
任候見任官成資日交替

八年五月十八日
欽已薦適今又薦

詔提轄

修京城所於廣固軍士內選及等者給羣牧司馬教習
武藝俟有精熟引見填配管城武騎白馬寧朔指揮關
額

己卯秦鳳等路提舉常平司乞增募州縣裁減過當役
人及增雇錢從之 東上閤門使曹評為西上閤門使

以太皇太后生辰恩也 前安南道經畧招討司言昨
官軍奪決里隘福建路有應募二百二十一人詔各以
功次遷補及賜帛有差 權荆湖南路轉運副使朱初
平言下班殿侍楊昌鑑是徽州黃石團奉職光鎮子自
陳三州一鎮補班行人甚衆未有一人出官者望優與
推恩詔授昌鑑三班借職增差監潭州稅 詔河北東
西永興秦鳳京東東西京西南北淮南東西路轉運司
並依未分路以前通管兩路其錢穀並聽移用除河北

陝西外餘減判官一員

庚辰命御史中丞鄧潤甫知制誥孫洙並兼詳定重修

編敕 詔開封府界提點諸路轉運副使判官罷兼提

舉常平司 又詔權同判都水監劉璿覆檢討曹村決

口功料以聞司馬光記開云元豐元年春塞曹村決口發民夫五十萬役兵二十萬云欲鑿故道

以導之不行則決河北岸王莽河口任其所之恐其浸

淫南及京城故也天章間待制韓縝都水監丞劉璿河

北轉運判官汪輔之掌之按韓縝於正月戊午相視決

河回乞止用新河量興功增修後不見縝督役河上不

知司馬光何以云然今因劉璿

覆檢討功料附注更當考詳

上批近降相州吏人

於法寺謂求失入死罪刑名事緣開封府刑獄與法寺

日有相干深恐上下忌礙不盡情推効致姦賊之吏得

以幸免宜移送御史臺

相州獄乃鞠法司潘開行賂實錄具有姓名蔡確傳獨稱馮言

獄馮言即失入死罪者見六月辛酉初韓琦判相州有三人為劫為隣里

所逐而散既而為魁者謂其徒曰自今劫人有救者先

殺之衆諾他日又劫一家執其老姥榜捶求貨鄰人不

忍其號呼來語賊曰此姥更無他貨可惜榜死其徒即

刺殺之州司皆處三人死刑房堂後官周清本江寧府

法司後為三司大將王安石引置中書且立法云若刑房能駁審刑大理刑部斷後違法得當者一事遷一官故刑房吏日取舊案吹毛以求其失清以此自大將四年遷至供備庫使行堂後官事相州獄已決數年清駁之曰新法凡殺人雖已死其為從者被執雖經拷掠若能先引服皆從按問欲舉律減一等今盜魁既令其徒云有救者先殺之則魁當為首其徒用魁言殺救者則為從又至獄先引服當減等而相州殺之刑部不駁皆

為失入死罪事下大理大理以為魁言有救者先殺之
謂執兵仗來鬪者也今鄰人以好言勸之非救也其徒
自出己意手殺人不可為從相州斷是詳斷官竇革周
孝恭以此白檢正劉奉世奉世曰君為法官自圖之何
必相示二人曰然則不可為失入奉世曰君自當依法
此豈必欲君為失入邪於是大理奏相州斷是清執前
議再駁復下刑部新官定刑部以清駁為是大理不服
方爭論未決會皇城司奏相州法司潘開賁貨詣大理

行財枉法初殿中丞陳安民簽書相州判官日斷此獄
聞清駁之懼得罪詣京師歷抵親識求救文彥博之子
大理評事及甫安民之姊子吳充之壻也安民以書召
開云爾自來照管法司竭其家貲入京師欲貸大理胥
吏問其消息相州人高在等在京師為司農吏利其貨
與中書吏數人共耗用其物實未嘗見大理吏也為皇
城司所奏言齎三千餘緡賂大理事下開封按鞫無行
賂惟得安民與開書諫官蔡確知安民與充有親乃密

言事連大臣非開封可了遂移其獄御史臺蓋從確請也

辛巳翰林侍讀學士寶文閣學士提舉中太一宮呂公著兼端明殿學士知審官西院先是上批公著侍從舊臣宜除翰林學士承旨兼舊職而公著以齒髮向衰辭不就故改是命太常博士集賢校理劉奉世直史館為修國史院編修官詔開封府劾權戶部判官主客郎中張充宗內殿承制勾當右驂驥院高遵制接伴遼

使緣路不法事先衝替聽追攝後充宗遵制各追一官

勒停坐以違禁物償違使所亡器皿於驛舍與雜戶通

故也

斷旨
在六月
己巳
今并書

詔京東路轉運司許借封樁差軍

代役人錢五萬緡西路轉運司許借坊場錢十萬緡預

置上供紬絹

壬午廣南西路經畧司言緣邊寨鎮使臣年滿及見闕

無人願就乞自今權免同罪更不取願就狀詔本路緣

邊寨鎮使臣自今並依五路舉官條奏舉權免取願就

狀候交人入貢取旨 權發遣本路提點刑獄劉宗傑言

邕州修城不依宣撫司指揮丈尺乞下經畧司相度修

築詔干繫官並劾罪其提舉官劉宗傑自案舉特免劾

委經畧司相度所築城如堪久遠守禦即督功完就若

低怯難以禦敵別計工以聞 復置三司帳司催驅官

一員

從李承之
奏請也

禮部言禘祫之外親祠太廟並以功

臣配享從之

去年十二月甲辰初
有詔而紀並書此

詔中書立給散常

平錢穀賞罰法以聞 又詔常平錢穀當輸錢而願輸

穀若金帛者官立中價示民物不盡其錢者足以錢錢
不盡其物者還其餘直常平倉錢穀其在民者有常錢
春散之斂從夏秋稅有所謂緩急闕乏而貸者皆定輸
息二分穀則歲豐量增價以糴歲饑減時價糴之以賑
饑又聽民以金帛易穀而有司少加金帛之直凡錢穀
當給若糴皆用九年詔書通取留一半之餘

此據食貨志第一卷

條之元豐元年檢尋月日未見今附此立給散常平錢
官賞罰後實錄稱賞法恐字誤當作罰也七年九月二
十六日并九年正月九日又二十二日並合參照五月
十七日實錄有詔常平錢穀願以穀及金帛准市直中

價計二分息折納者聽
即此事也或移此附彼

法寺奏新知福州曾鞏遷延

不之官等罪詔特罰銅十觔

癸未宣徽使王拱辰請以女童代集英殿大燕小兒隊
舞從之 知諫院蔡確言伏見陳繹復知制誥案繹汚
醜狼藉道路共傳往在鄧州遂致閨門之禍其子與婦
一夕同命而繹傲然無哀戚慙赧之容及還京師陰與
中書屬官張諤練亨甫等交相朋附因公事受張諤私
簡蹤跡已露不可更污侍從詔陳繹落知制誥為秘書

監集賢院學士 斬內殿崇班机榔縣巡防地分陳嵩
刺配三班差使机榔縣守把胡清沙門島坐妄稱賊至
無故擅棄城寨而走也

甲申以光祿寺丞上官均為太子中允權監察御史裏
行中丞鄧潤甫知雜蔡確薦也

均家傳云均用蔡確薦為御史四月乙卯可見

內殿承制謝季成權提舉訓練福建路團結諸軍 詔
編修明堂式所併歸提點南郊事務所比較熙河財利
所併歸經制熙河財利司其詳定編修令式及詳定一

司勅並併歸修內諸司式所一路一州一縣勅併歸重
修編勅所詳定閒冗文字所令孔目房檢正官結絕以
上除見存外並罷局餘並依限了畢限外官吏罷添給
又詔刑部大理寺自今奏舉習學公事並舉曾試刑
法得循兩資以上人 賜度僧牒百付河北東路轉運
司買材木應副大名府澶州修倉

先是上元張燈太皇太后以齒疾不能食不出觀乙酉
上復令禁中張燈露臺妓樂皆入太后疾尚未平酒數

行而起

此據司馬記開

丙戌詔應捕盜公人罰銅錢並充轉運司捉賊賞錢

丁亥大名府元城縣主簿吳璋上所注司馬穰苴兵法三卷詔送武學看詳其後武學言有可采詔璋候武學教授有闕試兵機時務策各一道取裁

戊子太子中允權監察御史裏行彭汝礪為館閣校勘江南東路轉運判官既而汝礪辭校勘從之辭日復上疏論時事且言不患無將順之臣患無諫諍之臣不患

無敢為之臣患無敢言之臣上察其忠慰諭久之命

刑部員外郎檢正中書吏房公事向宗儒太常丞檢正

中書戶房公事畢仲衍並編修中書備對宰相吳充以

聖問多出意表故請為此書

聖問多出意表據李清臣與許將書三年八月十一

日書成

己丑詔贈尚書令韓琦依趙普例不加贈又詔河北

路以常平米賑濟饑民

庚寅福建路體量安撫司言捕獲廖思黨龍騎卒李員

楊禪乞法外重斷所冀元刺充軍之人有所畏憚不敢走竄上批並處斬梟首示衆

辛卯中書禮房習學公事蔡京言御寶批降指揮未經編錄成冊恐歲月滋久本末不全乞委官編錄從之仍命京管勾 詔宣徽院等處供報修注事旬終月終自今更不供起居院直供編修院日曆所

士辰以權知開封府樞密直學士右諫議大夫孫固同知樞密院事右諫議大夫集賢院學士同修國史蘓頌

知開封府

癸巳詔任緣邊及黃河地分官試刑法者並須任滿待
闕在一季內者亦如之 三司乞裁定諸路預買匹帛
價羣牧司乞於德順軍置場買馬並從之 詔大理寺
丞王欽臣展磨勘四年前降一官指揮更不施行其轉
太常丞及降太子中允勅並追毀坐定奪解子平地界
不實案未上年例當遷已改太常丞及案奏特旨奪一
官而法當自未遷官時責降故也

甲午詔提舉官並差朝官資任服色添給錫賜序官人
從並依轉運判官例其當舉於開封府界提點諸路轉
運使副判官提點刑獄見舉官數內均減之

後立法諸路提舉所

舉官計二百有九人內一百有一人均減增定此墨本
所書朱本簽貼云取會到數各不同亦不須載削去

詔鄆州壽張知縣范規濟州鄆城縣牛在天各與堂
除差遣以縣水災率市民護城有勞也 又詔提舉司

天監近校月食時分比崇天明天二法已見新歷為密
又前閏正月歲在戊子今復閏於戊午恐理亦不謬宜

更不須考究其所差講究新厯官等並罷衛朴給路費
錢二十千先是朴在熙寧初更造新厯至十年議者以
為占月食差故再詔朴集議至是罷之

熙寧九年正月
二十七日沈括

奏并注云云並合參考新本削
去先是以下乃朱本所增也

又詔兩浙轉運使蘓

澥與知明州李定同計置造高麗國信過海船如別奉
朝旨幹事並聽牒提點刑獄或轉運判官 又詔諸命

官因事以財行求雖行倉法處非曲法者不坐受財者

論如法

丙申中書言陝西轉運使聽帶制置解鹽使其副使判官悉罷兼領安燾等奏乞差校書郎豐稷充書狀司並從之稷鄆人也 賜徐州乾明寺塔名曰靈慧僧真寂大師號曰靈慧大師先是徐州言河水為患九十餘日州城危甚長吏率官屬詣塔齋禱期決日水退當奏乞謚號至六日水果退而陰雨連日城中水潦無所決泄居民憂恐告病復禱於塔即時開霽真寂姓張氏名仁節河東人唐開元天寶間住持泗州盱眙縣先福寺應

化頗類僧伽父老相傳唐末亂離真身迎自泗州沂流
而上止於彭城州人相與置乾明寺至慶厯中始建今
塔乞賜師號塔名以旌靈應故也

張仁節傳李昭紀集有之

丁酉廢提點熙河蕃部司 廣南西路轉運司言昨退

交人表以犯廟諱及送還人口發使人入貢三事今交
人並已悛改經畧司勾當公事楊元卿未肯收接恐致
猜阻詔元卿等速受表附遞以聞入貢使人發遣赴闕
其畫定疆界送還人口別聽處分又言邕州太平寨乞

依陝西緣邊例增主簿一員從之

御史臺閤門言忌

日神御殿行香自今令羣臣班殿下宰相一員升殿上香跪爐從之先是三司使李承之言伏見神御殿酌獻設皇帝位於庭下升降再拜而國忌日兩府列於殿上輕重相形於義未安故詔御史臺閤門詳定而著為令上批據高遵裕所奏西人理索伊克等事此必嘗有熟戶出界因索不獲遂於和市縱火以搃一時之忿深恐羌人酬賽結成邊隙可速指揮郡延路經畧司止作

準環慶路牒訪聞柔遠寨熟戶因理索人口嘗私侵入
西界地分見根究移宥州照會庶羌酋知此非朝廷意
亦顯本路未嘗容其侵擾後十餘日再批令呂惠卿更
詳羌情緩急萬一或未嘗侵犯彼界即勿發此牒

熙寧十年

八月壬午九月乙卯當考元豐二年五月遵裕坐
得罪元豐元年五月戊戌范純仁責官當參照

戊戌知慶州高遵裕言乞避轉運判官孫迴詔迴移河
北路遵裕與迴嘗互訟市易及以結糴起詔獄故也

己亥太傅兼侍中致仕魯國公魯公亮卒年八十上奠

哭之輟視朝三日贈太師中書令配享英宗廟廷謚宣靖及葬恩禮視韓琦篆其碑首曰兩朝顧命定策亞勲之碑前一日車駕又臨之特恩非故事也上嘗語輔臣曰公亮謹重周密內外無間受遺輔政有始有卒可方漢張安世公亮喜薦士多得人然性吝嗇殖貨至鉅萬持祿固寵為世所譏晚年昏病以歌舞沈酣日夜初詔遺表外增推恩二人予比部員外郎孝宗遷一官殿中丞孝純賜同進士出身孫太祝說詠誼誥各遷一官後孝

純辭出身乞以所得恩官其族人之未仕者許之

孝宗等推

恩依朱本自三年二月己亥移入墨本論公亮短處朱本悉以無照據刪去新本復存之有己附見熙寧三年

九月

庚子日中有黑子如李自是至戊午凡十九日 日本

國通事僧仲回來貢方物 知諫院蔡確同御史臺鞠

相州失入死罪審刑院大理寺定奪不當干繫官吏令

開封府劾之潘開事下御史獄旬餘所案與開封無異

乃詔確與御史同鞠確以擊搏進吳充素惡其為人會

充謁告王珪奏用確上從珪所請也

此據司馬
光記聞

辛丑詔簽書樞密院事曾孝寬遭父喪令依舊簽書

此據

密記當考二月四

日候卒哭起復

壬寅環慶路經畧司言環慶二州闕乏蕃部及弓箭手

去年合納欠負乞依漢戶等倚閣七分至將來秋料納

從之 廣南西路轉運司言桂州增屯兵馬乞於全永

等州撥糧二十萬石及於衡州鑄錢監給十萬緡應副

支遣詔糧於荆湖南路轉運司撥錢以本路去年未起

發年額等錢五萬三千餘緡充仍具軍興所餘後來已
支現在數以聞

癸卯入內副都知經制熙河路邊防財用等事李憲言
同經制官及同管勾經制官分巡所至州軍各稱行司
官吏上下難以遵稟乞同經制官以下凡遇分巡如事
干邊防蕃部弓箭手及差移官吏勾抽役兵改易措置
候回本司與長吏從長商議所貴上下易於稟從從之
仍許憲銜內增都大二字本司管勾官並申狀 修閑

曹村決口所言昨計修閉之功凡役兵二萬人而今止得萬五千人有奇詔河北東路開封府界差雇萬人

甲辰權荊湖南路轉運副使朱初平乞以耕牛博買器甲又乞廣南西路軍興剩數糧草撥充合搬上供額並從之詔河北被水戶如過河逐熟即於白馬縣河陽橋差官賑濟之

欽定四庫全書

史部

續資治通鑑長編卷二百八十九

詳校官檢討

臣

劉錫五

刑部郎中

臣

許兆椿覆勘

纂修官修撰

臣

黃

軒

臚錄

監生

臣

黃

琮

欽定四庫全書

續資治通鑑長編卷二百八十八

宋 李燾 撰

神宗

元豐元年二月丙午朔提舉市易司俞充言永興軍路
當兩川秦鳳熙河涇原環慶衝要乞皆置市易務與經
制熙河路邊防財用司所置市易相為表裏以牽客旅
往來仍許借內藏錢四十萬緡為本候收秦州等市易

錢撥還詔財用司同相度以聞後財用司言竊慮他官
典領以各司錢物分彼此即往來物貨或相害乞與本
司經制同講求別具興置次第以聞從之 廣南西路

轉運司言昨交人擾邊大兵討伐調發軍費事務實繁

本司倉猝之中不用常制差擇得力官吏舉人等分督

丁夫糧草應副軍前今以勞績分三等乞賜酬獎詔中

書如累奏未嘗施行可差次輕重量與推恩

御集乃轉
運使張頤

奏

丁未江南西路提舉司言興國軍永興縣有熙寧六年
至九年拖欠役錢萬二千餘緡本縣民戶地薄稅重累
經災傷又役錢稍重乞特賜蠲免從之 轉運司言準

樞密院劄子建昌軍近因廖恩驚劫乘此人情思保聚
之際可以修城令計工料以聞今相度物料人工若坊
郭民戶出辦不足即更令南豐兩縣三等以上戶等第
出備又不足即給省錢從之仍須歲豐分三料修築

詔蔡延慶展磨勘二年時延慶被責落龍圖閣直學士

為天章閣待制法當磨勘特展之也

己酉命輔臣祈雨 詔比部員外郎畢仲熊減磨勘二

年右贊善大夫李熙等各減一年仍與先次差遣前桂
州觀察度支黃綯等各循兩資進士張祖禮入額差攝
仲熊等以應副安南軍須綯等以隨軍有勞也 淮南

東路提舉司言收糴并折到斛斗除準備外所管約八
百餘萬石慮將來陳積難以轉移況本路甚闕見錢聞
京東水災乞豫令收聚本錢移於淮東近便州縣或自

清河運致以糧穀撥還却於折糶本錢上聽量出息其
步乘亦令管認又京東東路體量安撫黃廉言西路及
徐州淮陽軍良田百餘萬頃被水退遲麥種不入秋田
又失指擬乞於淮南路沿流豐熟州縣借常平錢十萬
緡和糶或於去年折納糧內借十萬石依元折價計數
為所借錢水運赴京東以備賑糶聽司農寺移用詔京
東淮南東路提舉官於界首會議以聞 詔曾孝寬候

卒哭令起復

中書時政記閏正
月二十六日可考

庚戌昭化節度使同平章事襲濮國公宗誼卒贈太師
中書令廣陵郡王謚莊孝遺表推恩十二人文賜三人
權發遣三司使天章閣待制李承之權三司使 詳

定禮文所言有事於南郊薦享景靈宮朝饗太廟大率
皆踵唐禮至於壇壝神位大駕輿輦仗衛儀物亦兼用
歷代之制若概以先王之禮固已不同必兼用歷代之
制則其間情文訛舛甚衆蓋有規摹苟畧而因循已久
重於更制者有事出一時之儀而不足以為法者謹先

具一二奏陳恭俟訓勅以為體式詔詳定合更事以聞
錄皇城使權發遣廣南西路鈐轄順州駐劄介定姪
天祐為三班借職定從郭逵南征所至常先登破賊及
留新造順州撫養士卒完葺城壁圖畫山川道路戰陣
之法咸有可稱染瘴而卒無子故有是命 樞密院言
諸路已團結諸將官押隊使臣專一教閱外聞不係團
結將兵處兵官全失訓練知州亦不提舉點校致武藝
生疎欲令逐路經畧安撫總管鈐轄司指揮當職官等

常切教習若朝廷差官點閱武藝稍疎當職官重行朝
典從之 權發遣提點開封府界諸縣鎮公事集賢校
理蔡承禧言竊惟陛下所以哀憐元元發於惻怛之仁
心講義倉之法使臣等奉行之今率以二石而輸一斗
至為輕矣臣之領邑二十二其九已行歲斛幾萬請自
今歲夏稅之始不煩中覆而舉行之乃詔畿縣皆立義
倉事隸常平司

實錄刪承禧奏願畧今從本志
熙寧十年九月癸酉初立義倉

詔提

舉修閑曹村決口所察視兵夫飲食如有疾病令醫官

悉心治療具全失分釐以聞當議賞罰

辛亥提舉成都府路茶場司請自今應支撥與諸司錢並支見錢金帛勿以茶折所貴不致諸司增損茶價有害茶法從之 明州言得日本國太宰府牒稱附使人

孫忠遣僧仲回等進絕二百匹水銀五千兩本州勘會孫忠非所遣使臣乃泛海商客而貢奉之禮不循諸國例乞以此牒報仍乞以所回賜錢物付仲回從之

壬子權荆湖南路轉運副使朱初平等言準朝旨招納

三州一鎮楊光偕等出漢管勾招納使臣等逾年在邊深入不測委實有勞效詔各遷補職名及賜帛有差

詔給鹽鈔三十萬緡付羣牧買馬 文思使知府州折

克柔領忠州刺史以河東路經畧使韓絳言克柔承襲

已及六年乞依折繼祖例優與遷官故也又言乞令弓

箭手買四尺四寸以上馬仍勒貼納虧官價從之免貼

納價錢 詔叙宗室前右監門率府率叔諱不欺並為

右內率府副率不欺以在式假入殿唐突叔諱毆殺白

直卒被罪至是特叙之也

又詔剋擇官祖安道奪一

官時上為曾公亮舉哭安道擇二十一日吉既而自陳與國音相衝請改用二十二日特責之

癸丑都提舉市易司請貨滯於本司者聽臨時依時價轉易如虧元直即於每年比較椿留準備失陷錢豁除從之詔自今親祠太廟焚冊於南神門外其祀郊丘匏爵獻而不酎內壇之外衆星位周環每二步別植筍椿一緇青繩三重以為限域先是提點南郊事務向宗

儒言車駕詣太廟行禮畢焚冊於齋殿門外禁衛於此
坐甲地步狹隘乞於南神門外少東焚冊又言郊壇內
墮之外衆星設位舊無限域乞依內墮限以筭椿綳繩
又言冕服器用多參以今禮雖匏爵獨循古制恐未為
稱又酹酒於盤嫌於裸獻恐非大神不裸之義乞下禮
官詳議至是禮院奏以為焚冊於南神門外壇墮綳繩
以限星域及匏爵獻而不酹當如宗儒議至欲飾匏爵
即非古案先儒義說但曰破匏為爵而不云有飾且取

其自然以象天地之性故有是詔 御藥院言藥材有

市販所無乞下諸路轉運司具出產州軍如闕本院以
所須名色科置上供從之 軍器監言皮角庫所管牛

虎豹鹿等皮角累萬乞委官編簡堪造軍器并膠料外
其病色皮角分等估賣從之 上批故西京左藏庫副

使河東第六將陳濟美子從善昨為在京教習馬軍所
指使近以父喪奔訃宜以濟美父在河外累有戰功與
麟府路指使仍賜絹二百

甲寅邕州觀察使宗暉為淮康軍節度使封濮國公

兩紀

並書

都大提舉淤田司言京東西淤官私瘠地五千

八百餘頃乞依例差使臣等管勾從之

詔新知單州

都官郎中梁端與宮觀差遣新權知泰州屯田郎中段

縫別與合入差遣以知諫院蔡確言段縫並無才能乞

追還所授新命故也

元祐二年二月辛卯詔朝散大夫段縫落致仕與管勾宮觀縫在熙

寧中知興國軍嘗論免役不便元豐初宰相吳充專進熙寧異議之人乃除縫知泰州諫官蔡確上言計縫資秩當通判而中書擢知州縫初無才能止以嘗詆毀新政故膺獎任滋長背公慢令之風是天子黜陟之柄臣

下可得而回也。詔與縫合入差遣，乃得通判閬州。縫避遠求分司，遂以本官致仕。至是，左司諫王觀薦之，故有是詔。新史辨曰：蔡確挾姦希進，專媚王安石以議新法，為背公慢令。今刪去宰相吳充以下十一字。

乙卯，鄜延路經畧使呂惠卿言：「近以軍馬分定，九將已具條約奏乞早賜指揮。」詔惠卿審度事，幾以團定將兵當取裁事，遂急從宜施行。務在詳審，後上批九將條約內擬定，將副恐須更選詔送樞密承旨司同呂大忠、薛昌朝看詳以聞。

壬戌，燕國公主薨。上長女，皇后所生也。

戊辰分命輔臣祈雨於郊廟社稷仍令京東京西河北
河東陝西淮南等路愆雨州軍長吏禱名山靈祠 權
發遣河北轉運判官太子中允王輔之提點河北東路
刑獄以知定州薛向言輔之先奏本州軍糧麓惡後因
定奪朝廷遂移輔之東路今河北併為一路乞引避故
又改輔之也 上批手詔前安南戰棹都監楊從先等
頃以孤軍冒犯不測深入賊境大小數十戰雖無甚斬
獲然官軍亦不致傷敗今師還繫獄殆將逾年原其勞

於王事實可矜愍况昨已經郊赦宜並釋之其同行有

功將士等仍第賞以聞尋令從先赴闕

舊紀全載此詔

己已詔義勇保甲上番所省諸軍請給惟糧米聽留本色外餘並封樁仍以諸路義勇保甲隸提點刑獄司開封府界隸提點司知瀘州任伋奏納溪寨蠻甫望箇恕等乞請受上批可量與廩給以羈縻之伋眉山人也

明年正月九日與程之才互訟

詔外任文武官乞試換者並俟己替

就試詔提舉成都府等路茶場司應置場賣茶州軍

知州通判並兼提舉經畧使所在即專委通判兼之

詔知康州供備庫副使李時亮降一官監押右侍禁衛
立之降兩官司戶參軍孔元孫衝替坐不救火焚器甲
二十四萬會赦特責也

庚午河東都轉運使陳安石言年穀屢登當廣行計置
乞於河北權住糴見錢京鈔內支三十萬緡市糧草以
備朝廷緩急移用如積久令轉運司依常平兌換詔給
鈔十五萬緡餘從之
詔應諸軍陣亡賻絹陣勝將校

三十匹兵二十匹不勝各減半民兵準此著為令 又
詔諸城寨堡鎮常平錢穀已給十日具數申司農寺歲
終上都數 三司奏在京倉庫支納浩瀚自御厨至店
宅務其監官乞奏舉從之

辛未詔權桂州司理參軍徐伯偕攝廉州石康縣尉徐
伯準並追毀出身以來告勅除名勒停永不收叙百姓
徐建安等並杖脊送荆湖北路編管以不知覺徐伯祥
赦前通書交趾特斷也伯祥初以布衣募衆擊交賊授

右侍禁為沿海巡檢王師抵富良江乾德遣人以伯祥
熙寧六年書至其書自稱巨宋遊士臣伯祥教以擾邊
且以朝廷為負其功故積怨欲捨墳墓棄親戚而歸彼
於是詔捕伯祥伯祥遂自經死而伯偕者其同母兄伯
準者其同堂弟建安其子也

伯祥授官在熙寧九
年三月二十一日

壬申詔知雄州歸信容城兩縣西頭供奉官李澤尉右
班殿直宋彥圖在任無引惹及巡防不失事體澤除閤
門祇候彥圖遷一官並再任

三月乙亥朔命太子中允權發遣河北東路提點刑獄
汪輔之文思使屯田司都監謝禹珪同管勾修築塘隄
詔奉使高麗使副所過州郡迎勞並視使遼例 知

順州陶弼乞監洪州玉隆觀若限負即乞致仕詔令趙
高體量如實衰病即選差彊力官替弼回桂州 詔禮

部貢舉

戊寅京西南路轉運司言秘書監高賦言唐州民請地
生稅實公私之利乞并登州南陽縣民有田無稅及稅

少地多立限一年自陳據項畝立稅給帖聽為永業限
滿不言聽人告請從之 詔都水監調撥汴口水勢接

淮汴行運其曹村大河決口水雖已還故道然未通順
宜用濬川杷疏濬三日一具疏濬次第以聞賜塞決河

役兵特支錢有差凡一萬八千四百七人

人數據
御集

淮

南東路提舉司請額外民戶增出役錢從下蠲減從之
己卯廣南西路轉運司乞下荆湖南路轉運司兌支全
永二州糧為桂州軍儲詔經畧司同轉運司相度減戍

兵於全永就食以上批漸邇盛夏北兵不耐暑可移桂
州戍兵過嶺就食永全不惟寬轉餉之力又得滯粟以
時變易不致積久陳腐故也 詔使高麗安燾等於今
日進發出門賜御筵於永寧院 賜度僧牒五十付京
東西路轉運司市修橋木

庚辰權陝西路轉運使度支郎中皮公弼直昭文館為
都轉使 太子中允王子韶知禮院仍於資善堂置局

修定說文

五年六月
九日成書

賜度僧牒五百付三司兌撥上

供錢五萬緡償廣南西路經畧司

辛巳疏決繫囚雜犯死罪以下第降一等杖以下釋之

令諸路監司覺察巡案結絕刑獄毋令淹蔓 命太常

博士秘閣校理陳睦假起居舍人直昭文館為高麗國

信副使代林希希謫監杭州樓店務以上批聞希雖迫

懼朝命不敢終辭然形貌憂鬱不少舒且高麗望中國

使人久矣苟一見希顏狀如此甚非所以使彼識達朝

廷眷顧遣使通好之意今雖已啟行理終未便宜遣人

代之故也

九月二十一日還使

御過英閣沈季長進講周禮八

法上曰或言邦治或言官法何謂也季長以義對

壬午同知諫院黃履言近遣官禱雨今又降釋罪囚聞
三司罪人七十餘人而免者四開封百餘人而免者五
由二者推之則淹延未決者蓋多矣乞令隨其罪之輕
重立限結絕庶乎被澤者衆而感天不旋日也詔遣檢
正中書吏房公事王陟臣檢正刑房公事范鎬同三司
開封府官吏了絕見禁獄疑者申中書樞密院 環慶

路經畧司奏夏賊遣威沁刺事及張言點集大兵入寇
匿於熟戶吹寧家詔經畧司根問非虛皆斬訖奏是
日侍讀呂公著讀後漢書畢上留公著極論治體至三
皇無為之道釋老虛寂之理公著問上曰此道高遠堯
舜能知之乎上曰堯舜豈不知公著曰堯舜雖知之然
常以知人安民為難此所以為堯舜也上又論前世帝
王曰漢高祖武帝有雄才大畧高祖稱吾不如蕭何吾
不如韓信至張良獨曰吾不如子房蓋以子房道高尊

之故不名公著曰誠如聖諭上又曰武帝雖以汲黯為
戇然不冠則不見後雖得罪猶以二千石祿終其身公
著曰武帝之於汲黯僅能不殺耳上又論唐太宗公著
曰太宗所以能成王業者以其能屈已從諫耳上臨御
日久羣臣畏上威嚴莫敢進規至是聞公著言竦然敬
納之

此據范祖禹帝學
及呂公著家傳

癸未詔選日遣官禱雨於風伯雨師 權發遣福建路
轉運使屯田郎中蹇周輔直史館 廣南西路經畧司

乞以兩江峒丁團成指揮權補人員部轄及置馬社乞
降度僧牒五百市戰馬千匹分給峒丁候教成可戰以
次令自買馬教習詔峒丁止令習溪峒所長武藝勿教
馬戰餘從之先是權知邕州劉初等被旨抄點左右江
峒丁團結成保隊乞每五百人為一指揮別差正副使
二人都頭五人統轄教閱又言峒丁昨覩王師討伐交
人因馬取勝願習馬戰乞選兩江武勇峒丁結成馬社
人自買鬻馬每匹官給錢三萬如死即買填馬主備三

分之一餘令社內均出如習閱武藝出倫優與遷補仍令提舉教閱司遇呈試注籍如藝疎三次注籍即以其馬別給藝精之人故有此旨 詔文臣在京監察御史

裏行在外諸路提點刑獄府界提點以上武臣在京閣

門副使在外路分鈐轄以上各舉堪應武舉一人

本志但稱

元豐初

丁亥上批皇太后叔光祿寺丞高遵惠可除軍器監丞
詔編修諸司式所重詳定宗室外臣葬式以聞 詔

前知吉州駕部郎中張鑑上殿所言無取及用字乖謬
其本路監司提舉司元保明治狀顯有不當特免劾放
罪 詔使高麗涉海新舟並賜號其一曰凌虛致遠安
濟神舟其次曰靈飛順濟神舟 御邇英閣講官黃履
進講周禮八柄上曰坐而論道謂之三公而八柄非太
宰所得與何也履曰八柄以馭羣臣馭者主道也故非
太宰所與上曰善

戊子右諫議大夫蘓寀為給事中寀知廣州回故事當

遷官也

庚寅詔時雨稍愆遣官禱元冥五星 上批御史臺鞠
相州法吏事多逮繫品官宜趣結絕釋其無罪者其雖
有罪非受贓及徒以上者勿繫留 熙河路經畧司言
西人鎖珠旺蕃部納木沁於地牢五日放回詔納木沁依重
傷例給賜仍令保安軍牒宥州誠約之

辛卯遣官謝雨 御邇英閣講官沈季長進講周禮九
賦上曰或言關市之賦或言關市之征何也季長以義

對

士辰詔賀同天節遼使見日賜燕下節別為一行設座
先是賀正旦使牒館伴所言舊例燕座上中節自為一
行下節負壁今乃三節並為一行館伴以聞故也

癸巳詔河北轉運司塞決河所借水利司稈草令澶州
償其值仍令本司秋熟買足 權發遣荆湖北路轉運
判官馬瑊言山獐作過已依捕張奉例立賞募歸明人
等捕殺及乞朝旨下邵州捕盜官照應從之仍具獐賊

見存徒黨以聞 羣牧判官王欽臣請買紬綿綺及虎豹等皮博馬從之 御邇英閣講官黃履進講周禮九式上曰賓客之式次於祭祀而八政七曰賓者何也履以義對

乙未御崇政殿閱諸軍轉員凡三百

丙申詔開封府界諸縣及諸路轉運提舉司權停催理
第四等以下戶欠負候夏熟輸納 判司農寺蔡確言

本寺典領新法事務繁重非諸寺監之比官屬雖以才

選而並皆不別理資任欲乞丞主簿並二年理一任別除差遣者須候成任遇有員缺除朝廷特差外丞選於主簿比轉運判官都丞選於諸局丞比提點刑獄其資淺者差權與權發遣從之仍詔候理正運判以上資序三年為一任 詔應諸軍軍員等與管軍臣僚同姓名者並令改名

丁酉詔諸提舉市易官二年一比較取裁 詳定諸司敕式所言今修定學士院龍圖天章寶文閣等處敕式

如得旨施行後續降朝旨乞從本所詳定編入及見修
內諸司令式事干有司奉行者並分入逐司從之 荆
湖北路都鈐轄司言辰沅獠賊寇畧近邊兩月未獲已
於沅州調軍防拓捕殺乞下湖南照應上批付馬瑊如
賊黨衆多須藉正兵及近上兵官即關牒鈐轄司差撥
并暫差荆湖北路都監彭孫前來其已抽到土丁恐春
深妨農畧不得力先遣歸其不遣者以錢米優給之

鄜延路經畧使呂惠卿言昨準朝旨令延州西路同都

巡檢策應環慶路慶州東路巡檢策應廊延路遇賊大
舉聚入一路更以主兵之官引兵策應若本路自有兵
事令經畧臨機相度以別將應援臣竊謂敵興師動數
十萬分犯兩路則所在皆賊我安知其何出也苟知我
有策應之法而欲攻廊延必見其形於環慶環慶告急
則廊延起兵以應之欲攻環慶必見其形於廊延廊延
告急則環慶起兵以應之少則不足以應敵多則本路
必見空虛無備之處如此非特我兵趨疾疲曳有墮賊

掩伏之虞彼又將分兵擣虛以襲我矣此非所謂善戰致人者也臣愚以為諸路有兵事其鄰路但當團集以爲聲援或且依條相度牽制不必更立互相策應之法免致臨事拘文以犯兵家之忌詔鄜延路依奏餘路別

聽指揮

實錄載此密院時政記尤詳今但從實錄

或又言昔年劉平因救隣

道戰沒自今宜罷鄰道援兵環慶副總管林廣以謂諸道同力乃國家制賊之長計苟賊併兵寇一道而鄰道不救雖古名將亦無能爲劉平之敗非援兵罪於是互

相策應之法得不廢

此據林廣傳附呂惠卿建議後

守將作監主簿

王得君與堂除差遣得君廣淵子也上批廣淵昔嘗遭

遇英宗故特有是命

此據御集二年
年末可并入

戊戌賜故衛王高遵甫先借宅一區遵甫皇太后之父也

已亥詔大河初復故道尚或壅遏令都水監遣丞一員
於上流王供等埽往來照管及別差官提舉下流隄埽
西京左藏庫副使前安南道行營戰棹都監楊從先

言昨在交趾東涇港口久不聞大兵消息聲勢遂差效用樊實黃宗慶等往占城交趾兩界刺事及諭占城毋援交趾恐交趾賊遁逃令以兵把截今據實等狀稱占城遣蕃兵七千扼交賊要路得其國主蕃書回牒見在潭州制院乞取索看詳優獎之所貴以風勸外夷實宗慶並與三司軍將詔湖南轉運判官都官員外郎趙揚繳進蕃書牒本其樊實黃宗慶仍發遣赴闕

庚子以故入內東頭供奉官寄供備庫副使裴昱子孝

先為三班借職以昱勾當內東門十年有勞故也

辛丑荆湖北路轉運判官馬城言邵州覘知作過獫人有意歸投若不乘勢招安竊恐結集浸盛中書擬令馬城以獫賊頭首依累降指揮施行其餘徒黨並聽來降釋其罪仍立賞募人捕殺及許徒中殺併或收捕赴官內丁先鋒支絹百匹牛四頭願就班行與借職其餘頭首減半給之願就班行並與下班殿侍膀於要路上批宜令馬城更勘會如今指揮未到以前其不許首身人

已悔罪投降即更不施行仍勿漏泄實封繳申

四月庚戌可考

詔河東永興軍等路各增提舉官一員以判司農寺
蔡確言近制提舉常平官不令他司兼領誠為至便然
有所部濶遠如此數路者恐獨員乏事故也 賜度僧
牒二百付河北轉運司以市年計修河物料 京東西
路提點刑獄司言第七副將供備庫副使張永昌賦性
輕率好勝自專以將官楊珪出自軍班常凌忽之凡有
公事不務協和詔永昌降一官與淮南遠處監當

